

# Ina lescha d'energia nuschaivla

Il comité grischun cunter la lescha d'energia preschenta ses arguments

■ (mc) L'emna passada è vegnì fundà en il Grischun in comité cunter la nova lescha d'energia cun exponents da pliras partidas. Il comité è sa furmà sut il co-presidi da cusseglier naziunal Heinz Brand (pps Claustra) e da Heinz Dudli (pbd Zezras). Il comité cumbatta la lescha d'energia principalmain perquai ch'ella portia grondas grevazzas tant per ils privats sco per las interpresas. Per il chantun Grischun haja la nova lescha plinavant in effect negativ sin las kundiziuns economicas. Il comité cunter la lescha d'energia fa valair sia critica vers la strategia d'energia cun ils arguments suandants:

## Promoziun excessiva da sulegl e vent

Tenor cusseglier naziunal *Heinz Brand* promova la nova strategia d'energia cunzunt l'energia da sulegl e da vent e quai a moda excessiva e cun grondas favurs fianzialis. Uschia vegn la produenziun d'energia idraulica concorrenza da considerablmain e daventa dischavantaggiada vers ulteriuras energias. Il sustegn transitoric d'implants idraulics gronds na po betg egalisar la preferenza da la produenziun d'ulteriuras energias. Per il chantun Grischun effectueschia la nova lescha d'energia dischavantatgs durabels per la produenziun d'energia idraulica. Quai haja natiralmain consequenzas negativas sin las entradas da las vischnancas e dal chantun. Energia solara e da vent possa vegnir producida en quantitads sufficientas mo sch'i dat avunda sulegl e vent, consequentmain n'è la produenziun betg constanta.

Questa instabilitad possa manar a black-outs fitg problematicas cunzunt per las interpresas. In'interrupziun da l'energia en las interpresas turisticas (hotels, telefericas, gastronomia etc.) avess en plirs resguards influenzas desastrosas per il chantun Grischun e quai tant per la segirezza sco per l'immagine e per la qualitad da las purschidas.

## Carburants vegnan pli chers

La nova strategia d'energia effectueschia plinavant in augment considerabel dal pretsch da carburants da tuttas sorts, punctuescha deputà *Heinz Dudli*. Plinavant duain ils vehichels cun tracziun a quatter rodas vegnir dischavantaggiads. Quai haja consequenzas grevantas cunzunt per las regiuns da muntogna che na sajan betg colliadas uschè bain cun il traffic public e cun vias confortablas sco ils centers urbans. Damai ch'ils abitants da las regiuns muntagnardas sajan bler pli dependents da l'auto haja la nova lescha per els gronds dischavantatgs. Tenor *Dudli* effectueschia la lescha ina transformaziun dal provediment d'energia e mainia la finala ad ina economia dirigida dal stadi. Scumonds, prescripziuns, novas taxas directivas e taglias sajan la consequenza. Interpresas pitschnas e mesaunas stoppian quintar cun ulteriura birocrazia ed ulteriuras grevazzas finanzialis. Per mantegnair ed augmentar sia cumpetitivitad dovria l'economia grischuna gist il cuntrari. La nova lescha saja perquai da donn per l'economia grischuna e sbassia l'attractivitat economica dal Grischun, concluda *Dudli*.

## Era negativa per il turissem

La nova lescha d'energia promova la construcziun da novs implants da vent ed uschia saja da quintar ch'i dettia er en Grischun novas turbinas da vent sco quella da Haldenstein, accentuescha *Brand*. La construcziun da tals implants devasteschia dentant il maletg da la cuntrada e sfigure-schia las muntognas. Per il turissem, la pli impurtanta pitga economica da noss chantun, haja quai consequenzas fatalas.

Plinavant adosseschia la nova lescha adina dapli custs d'energia e dapli custs per carburants a las interpresas. Bleras novas prescripziuns e scumonds sforzian da spargnar supplementarmain energia, obligheschian da cumprar adina dapli instruments ed apparaturas correspudentas per spargnar energia. Quellas grevazzas supplementaras engrevgieschian anc dapli la cumpetitivitad da las interpresas grischunas. Posts da lavur e la bainstanza vegnian uschia periclitads.

## Scumond da scaldar cun ieli

La nova lescha mainia ad in scumond da stgaudaments d'ieli a partir da 2029. Plinavant pretendia la lescha ina pli auta efficienza d'energia en ils edifizis, cuntegnia prescripziuns supplementaras tar renovaziuns, pretendia l'installaziun da dumbraders d'energia etc. Quai portia novas grevazzas finanzialis tant per ils possessurs da chasas sco per ils locataris.

Pet il comité ha la nova lescha d'energia consequenzas negativas greviantas tant per ils singuls abitants sco per l'economia, dentant era per la cuntrada e per la natira.



Ils dus co-presidents dal comité cunter la lescha d'energia; Heinz Brand (a san.) e Heinz Dudli.